



Data: 9 da mars 2011

dv140_0311_fortbildung_religionskunde_spesenansätze_rm.doc / nr. 140

DISPOSIZIUN DAL DEPARTAMENT

A chaschun da la votaziun dals 17 da matg 2009 (iniziativa d'etica) ha il pievel grischun decidì che las baselgias chantunalas dettian vinavant ina lecziun da religiun e ch'i vegnia introducida ina lecziun «enconuschientscha da las religiuns ed etica», e quai obligatoricamain per tut ils uffants da la scola populara. Tenor l'urari dal departament d'educaziun, cultura e protecziun da l'ambient vegn il rom «enconuschientscha da las religiuns ed etica» instrui a partir da l'onn da scola 2012/13 sin il stgalim superiur ed a partir da l'onn da scola 2017/18 sin il stgalim primar da la scola populara grischuna.

Da las personas d'instrucziun da la scola populara che termineschan lur scolaziun l'onn 2014 u pli tard vegni spetgà ch'ellas hajan las qualificaziuns per instruir il rom «enconuschientscha da las religiuns ed etica». En il senn d'ina regulaziun transitorica porscha la scola auta da pedagogia dal Grischun – per incumbensa da l'uffizi per la scola populara ed il sport – ils onns 2011 fin 2014 **in perfecziunament per instruir il rom «enconuschientscha da las religiuns ed etica» sin il stgalim superiur.**

Quest perfecziunament sa drizza a personas d'instrucziun dal stgalim superiur da la scola populara e plinavant a personas d'instrucziun da religiun che han – per incumbensa d'ina baselgia chantunala – dà sis u dapli lecziuns da religiun per emna sin quest stgalim durant almain in dals onns da scola 2007/08, 2008/09 e 2009/10.

Il perfecziunament dura 2 x 5 dis. Per ademplir il perfecziunament ston dus moduls vegnir visitads cumpletamain. Ils moduls sa basan sin il plan d'instrucziun dal stgalim superiur e pon vegnir visitads independentamain in da l'auter. Ils moduls han lieu a Cuir per tudestg ed a Roveredo ed a Puschlav per talian.

Sch'il departament ordinescha in perfecziunament obligatoric per las personas d'instrucziun en cas da l'introducziun da novs roms d'instrucziun, ston las vischnancas – tenor l'art. 21 al. 3 da la lescha da scola – tranter auter surpigliar ils **custs che resultan da l'alloschi e da l'alimentaziun ordaifer sco er ils custs da viadi** da las personas d'instrucziun ch'èn obligadas da far il perfecziunament. Tenor las disposiziuns legalas menziunadas qua survart fixescha il departament las tariffas.

En quai che riguarda las spesas da viadi e d'alimentaziun vegnan tut las participantas e tut ils participants entaifer il contingent indemnissads tenor las medemas tariffas en il rom dal perfecziunament.

Sa basond sin questas explicaziuns

dispona il departament d'educaziun, cultura e protecziun da l'ambient:

1. En il rom dal perfecziunament en «enconuschiantscha da las religiuns ed etica» per il stgalim superiur da la scola populara èn las vischnancas obligadas da surpigliar ils custs da l'alimentaziun e da l'alloschi ordaifer sco er ils custs da viadi da las persunas d'instrucziun admessas ch'èn annunziadas entaifer il contingent. En quest connex valan las suandantas tariffas:

past principal: 25.– francs

pernottaziun/ensolver: 100.– francs

spesas da viadi: I vegnan indemnissads viadis cun tren da segunda classa ed ils custs effectivs d'auters meds da transport publics. Sch'i n'è betg pussaivel da cuntanscher cun ils meds da transport publics il lieu da curs a temp e senza sforzs supplementars, importa l'indemnissaziun per duvrar meds da transport privats 0.70 francs per kilometer.

2. Sch'ina persuna d'instrucziun po duvrar ordaifer in alloschi privat (en l'atgna chasa da vacanzas, tar parentas e parents e.u.v.) vegni recumandà da reglar ordavant l'indemnissaziun da spesas tranter la persuna d'instrucziun e las persunas responsablas da l'instituziun ch'è responsabla per la scola.
3. Communicaziun a: instituziuns ch'èn responsablas per la scola; uffizi per la scola populara ed il sport; departament da finanzas e vischnancas; departament d'educaziun, cultura e protecziun da l'ambient.

DEPARTAMENT D'EDUCAZIUN,
CULTURA E PROTECZIUN DA
L'AMBIENT DAL GRISCHUN



Martin Jäger, cusseglier guvernativ